

**Date – 07/02/2026**

**Time - 18:30 -18:40Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES ( EVENING )**

1. Larsap Gen (Retd) Vijay Kumar Singh an Mizoram Ex-Servicemen League member-te chu India rama Ex-Servicemen a hmuh tawhte zinga inchei nalh leh zahawm ber an ni a ti.
  
2. Chief Minister Pu Lalduhomaan kum kum 2 kalta chhunga Mizoram sawrkar in kawlpheha chhit man a pek that avanga lawmman a dawn zawng zawng zat chu cheng vbc 7 chuang a tling tawh a ti.
  
3. Rajya Sabha MP Pu K.Vanlalvenan IAF in Lengpui ram an lei chungchang chhui tura Mizorama CIA luh tir turin Prime Minister Narendra Modi leh President Droupadi Murmu i te hnenah ngenna a thlen.
  
4. Ramchhungah AIIMS 23 a awm tawh tih Union Health & Family Welfare Minister, Jagat Prakash Nadda-a'n a sawi..

<><><>

## GOVERNOR

Larsap Gen (Retd) Vijay Kumar Singh an Mizoram Ex-Servicemen League member-te chu India rama Ex-Servicemen a hmuh tawhte zinga inchei nalh leh zahawm ber an ni a ti.

Vawiina State-Level Ex-Servicemen Rally, Aizawl Lammuala a hmanpuina-ah he thu hi sawiin, ram tana Ex-Servicemen-te huaisenna, inthununna leh hnaa inpekna chu a entawntlak a ti a, Mizo mipui leh sipai inkarah muanna, remna leh inzahtawna a awm thu sawiin, mipuite leh sipaite'n inlaichinna tha tak an nei a, he rally pawh hi inzahtawna, inringamna, thawhhona leh induhsaktawna lantirna a ni, a ti bawk.

Governor chuan Ex-Servicemen-te nunah mahni inphatna leh inpumpekna entirna ataka hmuh theiha a awm thu sawiin, an service chhungin chhungkaw bulah pawh awm lovin India ram hmun hrehawm tak takahte an awm kual a, anmahni avangin mipui an him thin a ni, a ti a. An that lai hun tam zawk ram tana hlantu Ex-Servicemen leh an chhungte puala Medical camp buatsaih a ni leh pension, hamthatna leh chhawmdawlina an dawn chungchanga vuivaina thlenna tur Grievance Redressal Cell siam a ni chu lawmawm a tih thu a sawi a, rah tha a chhuah ngei a beisei thu a sawi a. An tan medical camp lian tham leh changtlung zawk neih tuma hmalak a nih thu a sawi bawk a. Mizoram sawrkarin Ex-Servicemen leh an chhungte hamthatna a ngaih pawimawh thu sawiin, zonun zemawi 'Tlawmngaihna' chawinungin Ex-Servicemen-te zah taka tawiawm zel a tul thu a sawi bawk.

Ex-Servicemen Rally hmanpuitu Home Minister Pu K. Sapdanga pawhin thusawiin, ram tana inhlante leh ram zahawma siamtu Ex-Servicemen-te puala rally neih a ni chu ropui a tih thu sawiin, anmahni avangin India chuan beiseina sang tak a nei a ni, a ti a. Ram tana an thatlai hun tam zawk hmanga ram ralti leh hrehawm tak taka awm thinte ngaihsanawm a tih thu sawiin, duty an dah pawimawh hmasa tlat thin chu fakawm a tih thu a sawi a. Mizoram mipuiin Ex-Servicemen-te inpekna an hriatreng tawh dawn thu sawiin, tunah ralthuam tung rih mahse, khua leh tui entawntlak an nih chhonzawm zel thu a sawi a. Thalaite fuih phurtu leh entawn ni zel tura chahin, thalaite pawh an hnen atanga

inzira, ram leh hnam tana mi tangkai nih tum theuh turin a chah a ni.

Governor hian rally puala stall hrang hrang siamte a tlawh kual a, Ex-Servicemen-te kawmin hun a hmang zui a ni.

Vawiin hun hmanah hian Ex-Servicemen (ESM) 9, sipai huaisen chawimawina dawng 1 chhungte leh ram tana nun hlantu sipai nupui (Veer Nari) 5 te hnenah chawimawina leh tanpuina hlan a ni.



## CHIEF SECY VISIT SAITUAL

Chief Secretary Pu Khilli Ram Meena an Saitual District vawiin khan tlawhin Saituala Sorkar dept hotute hnathawhdan a thlirpui.

Saitual Bawrhsap Pu Srinivas Sadi a kaihhruaiin Chief Secy hian sorkar dept hotute a kawm a, Saitual District chu ruihhlo kalkawng a nih avangin, sawrkar leh khawtlang mipuite chu ruihhlo do kawngah tanrual a tul tih a sawi a, DC leh SP te chu khawtlang leh kohhran hruaitute nen thawk ho a theih tawp chhuah turin a chah a ni.

Pu Khilli Ram Meena chuan Saitual District chu Manipur leh Myanmar ram nen a inri avangin ralhlante pawh biometric registration tih vek tha a tih thu sawi bawk.

Sawrkar laipui scheme tha tak tak a tam tih sawiin, mi tam takin heng scheme te hi hmasawn nana an hman a, an lo tangkaipui theih nan department tin te chuan thawhhona tha an neih a pawimawh thu a sawi bawk a ni.

Chief Secretary hian Seling-ah Saansad Adarsh Gram Yojana (SAGY) hnuaia project hrang hrang te a tlawh a, Saitualah hian Head of Office te nen an inkawm hnuaah Tamdil a tlawh bawk a ni.



## CM

Chief Minister Pu Lalduhoma chuan kum 2024 May thla atanga kumin January inkara Mizoram sawrkar in kawlphehtha chhit man a pek that avanga lawmman a dawn zawng zawng zat chu cheng vbc 7 chuang a tling tawh tih vawiin khan social media post kal tlangin a tarlang.

Chief Minister chuan ramin hma a sawn zel theih nana theihtawp chhuah rengtu sorkar hnathawkte chungah lawmthu a sawi a. Facebook Page kaltlanga tarlan danin kum 2024 March thlaa Assembly a zawhna leh chhanna ah P&E Minister chun Power man bat zat chu cheng vbc 144 chuang a nih thu a tarlang a, May 2024 thla vek khan Bill pek that lawmman cheng singkhat vel an dawn tan thu leh hemi hnu hian thla tin lawmman hi an dawng chhunzawm ta zel a, May 2024 thla atanga Kumin January 2026 kara kawlphehtha chhit man a pek that avanga lawmman dawn zawng zawng chu Vbc 7 chuang a tling tawh a ni a ti.



## **LENGPUI LAND SCAM ISSUE-MP**

Rajya Sabha MP Pu K.Vanlalvena chuan vawiin khan Prime Minister Narendra Modi leh President Droupadi Murmu i te hnenah Mizorama Indian Air Force te hmunhma lei chungchanga thil dik lo awm te chhui tu tur Central Investigating Agency te tir lut tura ngen na a theh lut.

Pu K.Vanlalvena chuan ram venhimna atana thil pawimawh Mizoram chhunga din chu Mizo mipuite'n an pawm a.Chutih lain mi hlemhle leh pamham ten diklo taka sum an siamna hmanrua atan Mizoram leilung hman chu an rem tih loh thu Prime Minister leh President te hnenah hian ziakin a thlen a ni.

Mipui pawisa, Central sawrkar sum Indian Air Force te tana ram lei dan a thil dik lo awm zawng zawng te chhui chhuak a,dikna hailan a nih ngei theih nan Sawrkar laipui hnuaia dan bawhchhiatna chhuitu -central investigating agency te hnena a rang thei ang bera thupek siam turin Prime Minister leh President te chu a ngen a ni.

Puan tawh angin, Pu K.Vanlalvena hian nimin khan Union Home Minister Pu Amit Shah a hnenah Lengpui ram Indian Air Force hnena hralh chungchanga thil dik lo awm ngeia lang te chhui turin Central Investigating Agency te thu pe tura ngenna a theh lut a. Central pawisa IAF te ram leina atana hman a nih dan ah dân bawhchhiatna awm ngeia a lan thu leh diklo taka pawisa dawngtu te chhui chhuak ngei tura a duh thu Home Minister hnenah hian a thlen a ni.

Congress Party leh MNF Party pawhin a hran ve ve in Indian Airforce hnena ram hralh chungchang hi CBI chhuitir turin hma an la a, Congress Party chuan CBI Mizoram Unit ah FIR thehlutin MNF Party hian Chieg Vigilance Officer hnenah CBI chhuitir tura ngenna an thehlut a ni.

ZPM Party erawh chuan, CBI chhui tir an tum thu an sawi na in an thulh leh tih nimin khan ZPM Media Chairman, Revenue Minister Pu B Lalchhanzova chuan a sawi a, a chhan chu Congress party-in CBI Unit, Mizoramah FIR an thehluh tho avangin, ZPM PAC thurawn angin an thehlut leh dawn rih lo a ti.

## AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh [newsonair.gov.in](http://newsonair.gov.in) ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.



## UNION HEALTH MINISTER NADDA

Union Health & Family Welfare Minister, Jagat Prakash Nadda-a'n All India Institute of Medical Sciences (AIIMS) 6 awm thin chu tunah chuan 23 a awm tawh, a ti.

Vawiina Faridabad-a zirna in pakhat convocation inkhawm a hmanpuinaah he thu sawiin nu leh naupang hriselna tiamin hriselna lamah India-in nasa takin hma a sawn chho a ni, a ti a, TB natna vei zat pawh nasa taka tlahniamin hemi kawnga India hmalakna chu WHO pawhin a fak hle a ni, a ti bawh.

**(NSD)**



## MEGHALAYA MINING INCIDENT DEATH TOLL RISES

Meghalaya-a tunhnaia lungalhthei khur chhunga thil puak vanga thi zat chu 25 an tling tawh a, nimin khan chhanchhuah hna thawk tuten ruang 4 an hmuh leh bakah hliam tuar zinga pakhat, NEIGHRIHMS-a enkawl mek chu a thi leh bawk a ni. Tun thlengin tunge an nih tih finfiah tawh ruang 17 chu an chhungte hnen theuhah hlan an ni tawh a, thi zingah hian Assam mi 6 an tel a, Assam sorkar chuan thi chhungte hnenah zangnadawmna cheng nuai 5 theuh a pe dawn tih a sawi a ni.

Mynsyngat-a he lungalhthei laihchhuahna khur hi dan lova siam a ni a, police-ten mi 2 an man tawh a ni.

**(NSD)**



## PAK SUICIDE BLAST

Pakistan ram khawpui, Islamabad-a nimina Muslim biak in pakhata thih chilha thleng chu Islamic State (IS) pawlin an tihah an chhal a, Zirtawpni tawngtai neih laia he chetna thlengah hian mi 31 an thih bakah midang 170-in hliam an tuar a ni.

Islamic State chuan he pawl khawihna hi an tih anih thu Telegram channel-ah an tarlang a, bomb ti puaktu, Saifullah Ansari-a silai keng lai thlalak pawh an tichhuak a ni.

He thil thleng hi kum 2008-a Marriott hotel beihna thlen hnua pawl khawia chetna na ber a tling a ni.

**NSD)**

<><><>